



## PETRU ALLUTTU ORECCHIONI

***Abà chi lu mé' tempu c'è passatu  
Dugna ciucchittu mi pari la mòlti.***

1

Tuttu passatu c'è lu tempu méu!  
Pa' lu ch'à di passà no ni faeddhu.  
Fattu è lu tempu ch'à vulutu Deu  
D'esse tuttu inghjummatu lu ghjummeddhu.  
Tutti facini pettu parò éu  
M'assuccunigghju a dugna cioccaréddhu.  
Abali lu ghjummeddhu è inghjummatu!  
Agabbati si sò li fili tolti!

***Abà chi lu mé' tempu...***

2

Ogghji chi lu mé' tempu à presu bólu,  
Socu pa' agabbà l'ultimi affanni.  
Lu spiritu, lu donu e lu cunsólu  
L'agghju agabbati ill'agabbà di l'anni.  
Abali agghju d'aé la molti sólu,  
Passarà iddha in mezu a l'alti danni.  
L'affanni e disisperu e cuidatu  
Di murì una 'olta sò più folti.

***Abà chi lu mé' tempu...***

3

Ogghji chi lu mé' tempu è ghjuntu a fini,  
A lu mundu agghju a dà la dispidita.  
Sarrati sò li ghjanni e li camini  
Di candu éra illu campu di la 'ita.  
Mancati sò li fiori e li só' spini  
Pronti pal fammi l'ultima firita.  
Illa 'ita, pacatu o no pacatu,  
Basta com'à vulutu la mé' solti.

***Abà chi lu mé' tempu...***

4

Ogghji chi lu mé' tempu à dittu adiu,  
Un adiu a lu mundu ancóra dòcu.  
È veru chi ancóra sòcu ìu  
Parò a dispidimmi manca pòcu.  
A azza capulendi, senza brìu,  
Ci sòcu, in chistu mundu, e no ci sòcu.  
A poc'a pocu lu 'èntu è andatu  
Parò sòcu arriendi a véli sciòlti.

***Abà chi lu mé' tempu...***

5

Lu poltu è unu scóddhu undi m'azzumba,  
Inn altu lócu appugghjà no mi possu,  
Abali sòcu accultu a la mé' tumba  
Tocca e no tocca l'azza di lu fossu  
Palchì dugna multali a chì arrumba,  
Undi in tarra cunsumi ancóra l'ossu.  
No mi possu punì mancu avvuccatu  
Chi no v'entra difesa ill'alta colti.

***Abà chi lu mé' tempu...***

6

Nisciunu si ni fòccia la risa,  
Di no dì chi lu tempu 'èni e passa  
Palchì lu spirimentu è ca' ci avvisa  
Chi lu ch'è nату di murì no lassa.  
Cumparuta chi s'è l'óra dizzisa  
Abbassa l'òmu e dugna pompa abbassa.  
Passa la mòlti, chi Deu c(i)'à datu  
Mòlti cumuna pa' la 'ita in solti.

***Abà chi lu mé' tempu...***

Cal' à doni e ispiritu figura  
Com' e chi sia lu branu und' è iddhu.  
L' òmu chi salta e bóla in ciuintùra,  
Dachi passa lu tempu è a bacchiddhu.  
L' òmu è com' e lu fióri chi no dura,  
Chi dach' allìcia no pari più chiddhu.  
Dach' è a lu bacchiddhu appuntiddhatu,  
a chi puntu è vinutu l' òmu fòlta!

***Abà chi lu mé' tempu...***

Progettù:

**“ÉU FAÉDDHU GADDHURÉSU”**

Finanziàtu da la Legghji 482 di lu 1999, artìccoli 9 e 15 e Legghji Regionali 22 di lu 2018 –  
annualitài 2021